

30. januar 2003

UPA 2003/31

Inissianik attartorneq pillugu inatsisartut peqqussutaata allanngortinneqarneranik inatsisartut peqqussutissaattut nr. xx, uu. qqqq 2003-meersussatut siunnersuut.

(Peqqussutip atuuffiata ersarissarneqarnera, inuit atugaat malillugit inissanik innersuussisarnermut malittarisassat allanngortinneqarnerat, aningaasaliissutinit pissarsiat akiliigallaatigisassallu qaffasinnerpaaffissaat kiisalu nakkutilliineq pillugu malittarisassat nutaat.)

§ 1.

Inissianik attartorneq pillugu inatsisartut peqqussutaanni nr. 5, 31. maj 2001-imeersumi inatsisartut peqqussutaatigut nr. 18, 12. november 2001-imeersukkut, aamma nr. 2, 21. maj 2002-meersukkut allanngortinneqartumi makku allannguutigittinneqassapput:

1. *Kapitali 1* ima oqaasertaqassaaq:

"Kapitali 1.

Atuuffissaa kiisalu innersuussisarnermi maleruagassat

§ 1. Peqqussummi pineqarpoq illup illulluunniit ilaata ukioq tamaat najugassatut attartorneqarnera, attartortumit allamut attartortinneqarnera ilanngullugu, apeqquataatinnagu ineqarnermut akiliut aningaasaanngitsunik allatut akilerneqarnerasoq, aammalu apeqquataatinnagu illu ilaannakortumik allatut inigisassaannngitsutut attartortinneqarnerasoq.

Imm. 2. Peqqussut atuutinngilaq attartornernut inatsisit immikkut ittut malillugit aqunneqartunut, imaluunniit inigisanut Naalakkersuisunit Namminersornerullutik Oqartussat inissiaataannit attartortittakkanit immikkoortinneqarsimasunut.

Imm. 3. Peqqussut atuutinngilaq Namminersornerullutik Oqartussat kommunilluunniit illuutaanni sulisunik inissiinernut allatulluunniit utaqqiisaasumik inissiinernut, inissiinermut akiliisitsisoqarpat akiliisitsisoqanngippalluunniit apeqquataatinnagu.

Imm. 4. Peqqussummi taamaallaat pineqarput attartortitsinerit inunnet ataasiakkaanut tunngasut.

Imm. 5. Namminersornerullutik Oqartussat imaluunniit kommuni siunertanut aalajangersimasunut inissianik immikkoortitsisinnaapput."

§ 2. Attartornermut isumaqatigiissuteqartoqassaaq immersugassani kalaallisut qallunaatullu naqitani Naalakkersuisunit akuerisaasuni. *Imm. 2.* Allakkatigut attartornermut

isumaqatigiissummi aalajangersakkat, peqqussummi taaneqarsimasunit annertunerusunik attartortumut pisussaaffiliisut imaluunniit annikinnerusunik attartortumut pisinnaatitaaffiliisut atuutissagunik erseqqissarneqarsimassapput. *Imm. 3.* Imm. 1-imi 2-milu aalajangersakkat isumaqatigiissuteqarnikkut attartortumut ajoqutaasumik sanioqqunneqarsinnaanngillat.

§ 3. Illuni Namminersornerullutik Oqartussanit kommuninilluunniit pigineqartuni inissiat inigineqanngitsut tulleriiaarinerni taaneqartunut innersuunneqartassapput:

- 1) Namminersornerullutik Oqartussat kommunilluunniit iluarsaanerinut isaterinernulluunniit atatillugu inissaqartitsisarnissamik pisariaqartitsinerat naammassiniarlugu inissiat, takuuk § 48,
- 2) inissiat attartortut inigisaminnik piginneqatigiilluni pigisatulluunniit inissiatut tiguserusunngitsut attartugaat, takuuk § 7,
- 3) inissiat, siusinnerusukkut inissaqartitsinissamik qularnaveeqqusiisoqarsimanerata naammassineqarnissaanut innersuunneqartussat, tak. § 39, imm. 3,
- 4) inissiat aapparisaq toqukkut qimagaasup inigigisaanit suliffimmut aalajangersimasumut inniminnigaasumit qimatsineranut atatillugu innersuussutiginneqartussat, tak. § 43, imm. 2,

5) inissiat aapparisaq toqqukut qimagaasup inissiamit innarluutilinnut inissiatut immikkut aaqqissugaallunilu tunniussaasimasumit nuunneranut atatillugu innersuussutigineqartussat, tak. § 43.imm. 3,

6) inissiat siunertanut aalajangersimasunut inniminnigaasut, takuuk § 1, imm. 5,

7) sullissiveqarfinni inissaqartitsisuni sulisunut inissiat, takuuk § 4,

8) kommunip isumaginninnikkut ajornartorsiuteqartunut inissaqartitsinissamik pisariaqartitaanut inissiat, takuuk § 6,

9) nuunnissamik kissaateqartunut inissiat, tassunga ilanngullugit paarlaasseqatigiinnerit, aamma

10) nalinginnaasumik inissarsiortunut utaqqisut allattorsimaffianniittunut inissiat.

Imm. 2. Immikkoortoq 1-imi allassimasut apeqqutaatinnagit inissiat inoqanngitsut inissarsiortunut toqqaannartumik innersuunneqartassapput, takuuk imm. 6 aamma 7:

1) inissiat siunertanut aalajangersimasunut inniminnigaasut,

2) inissiat atorfinnut aalajangersimasunut inniminnerneqarsimasut, aamma

3) inissiat sulisunut inissiatut atorneqarsimasut.

Imm. 3. Sulisunut inissaqartinneqarsinnaallutik atorfinitsinneqarsimasunut inissianik Naalakkersuisut innersuussisinnaapput, takuuk imm.1, nr. 7. Inissianut sulisunut inigisassatut innersuussutigineqarsimasunut ukiumoortumik utaqqisut allattorsimaffianniiginnarniarluni uppersaasaaqqittarnernut atatillugu akileeqquisoqartarpoq. Tamatuma saniatigut Namminersornerullutik Oqartussat sulisunut inissiaataasa allaffissornikkut aqunneqarneranni aningaasartuutiviusut matussuserneqarnissaannut allaffissornermut ukiumoortumik akiliuteqaqquisoqartarpoq. Naalakkersuisut Namminersornerullutik Oqartussat sulisunut inissiaataasa allaffissornikkut aqunneqarnerat ingerlanneqarnerallu pillugit malittarisassiorsinnaapput, tassunga ilanngullugit ukiumoortumik akiliutigitinneqartartup angissusissaanik kiisalu allaffissornikkut aqutsinermit akiliutigitinneqartartup angissusissaanik aalajangersaaneq.

Imm. 4. Imm. 1, nr. 1 - 5 malillugu inissiat innersuunneqartut naleqquttumik angissuseqartinniarneqassapput pitsaassuseqartinniarneqassallutillu, ineqarnermullu aningaasartuutit tamarmiusut sapinngisamik inissiami qimatamisut annertussuseqartinniarneqassallutik.

Imm. 5. Naalakkersuisut kommunikkuaartumik kommunit ataasiakkaat isumaqatiginiareerlugit inissianut siunertat assigiinngitsut akunnerminni imminnut agguaassinermi pissusissaat aalajangersarsinnaavaat.

Imm. 6. Utaqqisut allattorsimaffiannut allatsinnermut atatillugu aamma ukiumoortumik utaqqisut allattorsimaffianniiginnarniarluni uppersaasaaqqittarnernut atatillugu akiliutit akileqquneqartarput. Innersuussisarneq aamma attartortitsisarneq, kiisalu utaqqisut allattorsimaffiinnik allaffissornikkut aqutsineq, akiliutit akileqquneqartarnerat annertussusissaallu pillugit Naalakkersuisut malittarisassiorsinnaapput.

§ 4. Namminersornerullutik Oqartussat sulisunut inissiaataat immikkoortunut sisamanut agguataarsimapput imalu tulleriiaarnilerlugit innersuussutigineqartarlutik:

1) Naalakkersuisunut ilaasortanut Naalakkersuisoqarfinnilu pisortanut inissiat,

2) Namminersornerullutik Oqartussat qitiusumik allaffeqarfianni immikkoortortaqarfinni pisortanut assigisaannullu akissaateqarfik 37 naapertorlugu taannaluunniit qulaallugu akissaateqartinneqartunut inissiat,

3) Namminersornerullutik Oqartussat qitiusumik allaffeqarfianni allaffiit pisortaannut akissaateqarfik 36 naapertorlugu taannaluunniit qulaallugu akissaateqartinneqartunut inissiat,

4) Namminersornerullutik Oqartussat qitiusumik allaffeqarfianni sullissiveqarfinni suliffeqarfinnilu tassunga atasuni kiisalu sullissiveqarfinni suliffeqarfinnilu inissaqartinneqarsinnaatitaasunut sulisunut allanut inissiat.

Imm. 2. Inissianik imm. 1, nr. 1-imi taaneqartunik innersuussisussaaneqarup naammassineqarnissaanut Namminersornerullutik Oqartussat inissianik arlaqartunik inniminniisimapput. Inissianik imm. 1, nr. 2-mi sulisunut taaneqartunut inissianik innersuussisussaaneqarup naammassineqarnissaanut Namminersornerullutik Oqartussat inissianik arlaqartunik inniminniisinnaapput.

Imm. 3. Sulisunut Inatsisartuni taakkualu suliffeqarfiutaanni inissaqartinneqarlutik atorfinitsinneqarsimasunut inissiat, kiisalu inissiat Inatsisartunut atugassanngortitat Naalakkersuisut Inatsisartullu akornanni isumaqatigiissuteqartoqarneratigut innersuunneqartassapput.

Imm. 4. Sulisunut Naalagaaffiup nunatsinni sinniisoqarfianit taassumalu suliffeqarfiutaani inissaqartinneqarlutik atorfinitsinneqarsimasunut inissiat Naalakkersuisut naalagaaffiullu sinniisoqarfiata akornanni isumaqatigiissuteqartoqarneratigut innersuunneqartassapput.

Imm. 5. Sulisunut sullissiveqarfinni suliffeqarfinnilu allani inissiatilinni inissaqartinneqarlutik atorfinitsinneqarsimasunut inissianik innersuussisarneq pillugu Naalakkersuisut malittarisassiorsinnaapput.

Imm. 6. Sulisunut inissaqartinneqarlutik atorfinitsinneqarsimasunut, takuuk imm. 1, nr. 2, 3 aamma 4, imm. 3 aamma imm. 5, makku atuupput:

1) Sulisup pineqartup isumaqatigiissutaani ersarissumik allassimangippat sulisoq inissiamik assersuutigalugu angissutsimigut inissisimanermigulluunniit immikkut ittumik

inissaqartinneqarsinnaatitaasoq, taava sulisoq sulisunut inissiamik innersuunneqarsinnaavoq,
2) sulisoq sulisunut inissiamik innersuunneqarluni akuersiumangippat inissiamik allamik innersuunneqarsinnaajunnaassaaq taamaattumillu inissiamut utaqqisut allattorsimaffiannit peerneqassalluni allatseqqissinnaajunnaassallunilu

3) sulisoq utaqqiisaasumik ineqartinneqarallartoq sulisunut inissiamik innersuunneqarluni akuersiumangippat utaqqiisaasumik ineqarnermi ajunngitsorsiassanik

tunineqaqqissinnaajunnaassaaq imaluunniit sulisitsisup akiligaanik

ineqartinneqarallarsinnaajunnaassalluni taamaattumillu aamma siunissami

ineqartinneqarallarnissani nammineq akilissallugu, aamma

4) sulisoq paarsinerlunnini pissutigalugu sulisunut inissiamit anisinneqartoq inissiamik allamik innersuunneqarsinnaajunnaassaaq.

§ 5. Inissianik § 3, imm. 1-imi taaneqartunik innersuussinermi inoqutigiinni inuit amerlassusaannit inimik ataatsimik amerlanerusunik innersuussisoqarsinnaavoq, taammattorli takuuk imm. 2.

Imm. 2. Inissianik § 3, imm. 1-imi nr. 4-mi 7-amilu taaneqartunik piniarnermi taamaallaat inissiat inoqutigiinni inuit amerlassusaannit ataasiinnarmik amerlanerusunik initalit

innersuunneqarsinnaapput, utaqqinerup sivilissusissaa inissiamik inoqutigiinni inuit

amerlaqataannik initalimmik utaqqinermit qaammatit pingasut sinnerlugit

sivilissusissangatinneqangippat.

Imm. 3. Sulisunut, takuuk § 4, imm. 1, nr. 2 - 4, imm. 3 aamma imm. 5, inissiat amerlanerpaamik tallimanik initalit piniarneqarsinnaapput, sulisoq inoqutigiinni inuit amerlassusaat naapertorlugu inissiamik anginerusumik innersuunneqartussaagaluarpuunniit.

Imm. 4. Najukkami inissianik attartortitsinermi ajornakusoortitsisoqartillugu inoqutigiinni inuit amerlassusaat ataatsimik sinnerlugu initalimmik inissiamik qaqutigorluinnaq

tunniussisoqarsinnaavoq.

Imm. 5. Imm. 1-imi 2-milu aalajangersakkat inissianik § 3-mi imm. 2, nr. 2-mi aamma § 4-mi, imm. 1, nr. 1-imi ilaatinneqartunik innersuussinermi atuutinngillat.

§ 6. Kommunalbestyrelsip isumaginninnermi ineqartitsinermit siunertanut innersuussisinnaatitaanini atorpagu, piffissaq inissiap kommunimit atorneqarsinnaalerfia aallarnerfigalugu aamma attartortitsilernissap tungaanut kommunip ineqarnermut akiliutit inissiamullu atatillugu aningaasartuutit allat akilissavai, soorluttaaq aamma kommunalbestyrelsi imm. 2-4 naapertorlugit annaasaqarsinnaanermut qularnaveeqqusiisussaasoq.

Imm. 2. Annaasaqarsinnaanermut qularnaveeqqutit attartortup ineqarnermut inissiamullu atatillugu aningaasartuutinik allanik, tassunga ilanngullugit iluarsaassinermut aningaasartuutit, akiliinngitsoornerani attartortitsisup annaasaqaatigisinnaasaanut tunniunneqartarput.

Annaasaqarsinnaanermut qularnaveeqqutit attartornerup atorunnaarsinneqarnerani taamaatinneqarneraniluunniit attartortitsisup annaasaqaatai paasineqarsimatillugit aatsaat atuutilersinneqarsinnaapput, attartugaq qimallugu allamut nuuttoqarsimanera taamaattoqanginneraluunniit apeqqutaatinnagu.

Imm. 3. Annaasaqarsinnaanermut qularnaveeqqutit attartulernermit ukiumut ataatsimut piffissaqarluni atuuttarput. Annaasaqarsinnaanermut qularnaveeqqutit qaammatini aqqaneqmarlunni ineqarnermut akiliutinut naapertuuttumik angissuseqassapput, taamaattorli annerpaamik 60.000 kr.-iussallutik.

Imm. 4. Annaasaqarsinnaanermut qularnaveeqqutit attartulernermit ukioq ataaseq qaangiuttoq atuutilersinneqarsimangippata taakku atorunnaassapput, tamatumalu kingorna attartortup ineqarnermut inissiamullu atatillugu aningaasartuutinik allanik, tassunga ilanngullugit

iluarsaassinermut aningaasartuutit, akiliinngitsoornerani attartortitsisumut piumasaqaataasinnaasut qularnaveeqqutikkut naammassineqarsinnaanngillat.

§ 7. Namminersornerullutik Oqartussat kommunilluunniit inissiaataasa ilaanni attartortut attartortitsisumut piginneqatigiilluni pigisassatulluunniit inissiaminnik tigusiniarlutik allakkatigut kissaateqarpata, attartortitsisup attartortoq piginneqatigiilluni pigisassatulluunniit inissiaatitaarusunngitsoq inissiap taamaaqataanik neqeroorfigissavaa, takuuk § 3, imm. 1, nr. 2. *Imm. 2.* Imm. 1 naapertorlugu inissiap taamaaqataanik neqeroorfiginnittussaataaneq taamaallaat atuuppoq, attartortup attartornermut isumaqatigiissut malissimappagu, aammalu attartortup inissiamik neqeroorfigineqarnissaminut piumasaqaatinik allanik naammassinissimappat. Attartortitsisup pissutsit pingaaruteqanngitsut imaluunniit attartortumit isumannaarneqareersut tunngavilersuutigisinnaanngilai.

Imm. 3. Namminersornerullutik Oqartussat kommunilluunniit inissiaataanni attartortut inigisaminnik piginneqatigiilluni inissiaatitut tiguserusuttut piginneqatigiilluni inissiaatilittut peqatigiiffiliorsimappata Naalakkersuisut §§ 3 aamma 45 sanioqqussinnaavaat, inissiap piginnittaata piginneqatigiilluni inissiaatillit peqatigiiffiannut inissiamik tigusinissamut allakkatigut neqe-roorfiginninneranit qaammatit qulingiluat iluini."

2. § 10, imm. 2 ima oqaasertalerneqassaaq:

"Imm. 2. Ukiumi tullermi najugaqatigiiffinnut ataasiakkaanut ingerlatsinermut missingersuutit attartortitsisumit suliarineqarsimasut akuersissutigineqarsimasullu tunngavigalugit ineqarnermut akiliutit ukiumoortumik aalajangersarneqartassapput. Piumasaqaatit imm. 1-imi taaneqartut naammassinissaannut pisariaqartumik attartornermut akiliutit qaffanneqarsinnaapput qaammatit pingasut sioqqullugit attartortunut pineqartunut allakkatigut ilimasaarutigineratigut. Ilimasaarut qaffaanerup naatsorsorneqarneranik, qaffaanermut pissutaasumik aamma qaffaanerup annertussusianik qaammammut koruuninngorlugit taallugit paasisutissanik imaqanngippat ilimasaarineq atuutissanngilaq. Attartornermut akiliutit apparneri ilimasaaruteqaqqaangitsumik pisinnaapput."

3. § 11, imm. 1 ima oqaasertaqassaaq:

"Illuutip sananeqarnermini akianut ilaapput sananeqarnerani aningaasartuutit tamarmik tassunga ilaallutik pilersarusiornera, nakkutilliineq sanaartorfissagissaanerlu. Illup sananeqarnermini akia kvadratmeterimut minnerpaamik 7.000 kr.-eqarpoq. Aningaasaliissutinit iluanaarutit naatsorsorneqarneranni illup sananeqarnerani kvadratmeterimut annerpaamik 15.000 kr.-eqarnera atorineqartarpoq sananeqarnerani aningaasartuutiviit qaffasinnerugaluarpataluunniit.

4. § 13, imm. 5 ima oqaasertaqassaaq:

"Imm. 5. Attartortitsisoq akit qaffannerisa, akiliutit qaffannerisa assigisaasalu kingunerisaannik imaluunniit attartortitsisoq illuutiminik attartorneqartumilluunniit pitsanngorsaasimaguni ineqarnermut akiliutit qaffanneqarnissaannik piumasaqaateqarsinnaatitaavoq. Piumasaqaat illuutigisami attartortunut tamanut qaammatinik pingasunik siumut ilimasaaruteqarluni saqqummiunneqassaaq. Ilimasaarut qaffaanerup naatsorsorneqarneranik, qaffaanermut pissutaasumik aamma qaffaanerup annertussusianik qaammammut koruuninngorlugit taallugit paasisutissanik imaqanngippat ilimasaarineq atuutissanngilaq."

5. § 17 ima oqaasertaqassaaq:

"§ 17. Attartornissaq isumaqatigiissutigineqartinnagu Namminersornerullutik Oqartussat kommunillu illuutaanni attartortittakkani inissianik attartortussat attartortitsisumut qularnaveeqqusiissutit qaammatinut pingasunut ineqarnermut akiliutit annertussusillit akiliutigissavaat. Attartortup attartornerup isumaqatigiissutigineqarnerani qularnaveeqqusiissutit aningaasannorlugit akiliutigisinnaanngikkunigut attartortup taakku qaammatikkuutaartumik akiligassanut angeqqatigiiaanut aqqaneq marlunnut agguarlugit akilersorinnaavai.

Imm. 2. Imm. 1 naapertorlugu akilersuinissamik isumaqatigiissuteqarnermi attartortoq 500 kr.-inik saniatigullu qaammatit tamaasa 50 kr.-inik akilersuinermut ilaasut akileqquneqartassapput. Piumasaqarnermut akiliutit attartortitsisup 50 kr.-it akiitsorineqartullu 1.000 kr.-it sinneraangatigit 2 %-iinik akileeqqusissutigisinnaavai. Akiligassat kr.-inut ilivitsunut qaninnernut ammut iluarsineqassapput.

Imm. 3. Akilersuinissamik aqqissuussineq attartortumit malinneqanngippat, tamanna

attartornermut isumaqatigiisummik naammassinninnertut isigineqassaaq ineqarnermut akiliutit piffissaq eqqorlugu akilerneqannginnerattut naatsorsuullugu, tak. § 18, imm. 1.

Imm. 4. Attartortitsisup inissiamik qimatsilluni nuuttoqarneranut atatillugu qularnaveeqqusiissutit attartortup attartornermut isumaqatigiissut naapertorlugu pisussaaffiisa matussuserneqarnerannut atorsinnaavai, taamatuttaaq attartortup iluarsaassinermut aningaasartuutunik akileeqaataassutissaanut, tak. § 58.

Imm. 5. Qularnaveeqqusiissutit pillugit maleruagassat Naalakkersuisunit aalajangersarneqassapput."

6. § 39, imm. 3-mi "§ 4, imm. 1, nr. 2" "§ 3, imm. 1, nr. 3"-nngortinneqassaaq

7. § 39-p kingorna ilanngunneqassaaq:

"§ 39a. Attartortut allamut nuunnissamik kissaateqarlutik utaqqisut allattorsimaffianniittut iluminni nuunnissamik isumaqatigiisuteqarpata tamanna allamut nuunnissamik kissaateqartut utaqqisut allattorsimaffianni qanorluunniit inissisimaneq apeqqutaatinnagu pisinnaavoq. Piumasaqaataavoq attartortut inigisaminnik paarlaannissamik kissaateqartut attartornermik isumaqatigiisummik naammassinnissimanissaat.

Imm. 2. Inigisamik paarlaannissamik akuerineqarnissamut piumasaqaataavoq inissianut paarlaannermi ilaatinneqartunut inissianik attartortarneq pillugu peqqussut qaqugukkulluunniit atuuttoq naapertorlugu attartornermik isumaqatigiisusiortoqarnissaa, tassunga ilanngullugu qularnaveeqqusiissutunik akiliineq.

Imm. 3. Inigisamik paarlaannermut atatillugu inissiat paarlaannermi ilaatinneqartut nalinginnaasumik iluarsanneqassapput nalinginnaasumilluunniit iluarsanneqarsimasutut isikkoqassallutik. Taamaattorli attartortut allakkatigut nalunaarutigisinnaavaat nuunnerminnut atatillugu attartukkamik nutaap namminneq iluarsaannissaa kissaatigalugu. Taamaattumik inissiat taakku nuunnerup nalaani pissusissaattut iluarsanneqarsimasutut isigineqassapput §§ 57 aamma 58-imut naleqqiullugu.

Imm. 4. Attartortup attartukkamini nutaami nuunnerminut atatillugu nammineq nalinginnaasumik iluarsaassinissani kissaataa attartortitsisup itigartissinnaavaa attartukkap nalinginnaasumik iluarsanneqarneranit kingullermit qaammatit tallimat sinnerlugit ingerlareersimappata.

Imm. 5. Nalinginnaasumik iluarsaassinissap nalaani inissiat inoqannginneri pissutigalugit inissiat paarlaannermut ilaatinneqartut imm. 3 naapertorlugu nalinginnaasumik iluarsanneqarnerannut atatillugu aningaasartuutaanerusoqarpat, taakku attartortumit inigisaminik qimatsisumit akilerneqassapput."

8. § 43, imm. 2-mi "§ 4, imm. 1, nr. 3" "§ 3, imm. 1, nr. 4"-nngortinneqassaaq.

9. § 43, imm. 3-mi "§ 4, imm. 1, nr. 4" "§ 3, imm. 1, nr. 5"-innngortinneqassaaq.

10. § 48, imm. 1-imi "§ 4, imm. 1, nr. 1" "§ 3, imm. 1, nr. 1"-innngortinneqassaaq.

11. § 60-ip kingorna kapitali nutaaq ilanngunneqassaaq:

"Kapitali 10a.

Nakkutilliineq

§ 60a. Namminersornerullutik Oqartussat kommuniluunniit avataaneersumik sanaartornermik aqutsisoqarpata Naalakkersuisut kommunalbestyrelsilluunniit inatsisartut peqqussutaat manna kiisalu peqqussut naapertorlugu aalajangersakkat malillugit sanaartornermik aqutsisup sulinini ingerlanneraa nakkutigissavaat tamannalu pillugu ukiumoortumik nalunaaruteqartassallutik.

Imm. 2. Kommune inissiatiminik nammineq aqutsiguni inatsisartut peqqussutaat manna peqqussullu naapertorlugu aalajangersakkat malillugit tamanna ingerlatissavaa.

Imm. 3. Inissiatillip nakkutilliisussaataani naammassiniarlugu inissianik aqutsisup kukkunersiuisua inissianik aqutsisup inatsisartut peqqussutaat manna peqqussullu naapertorlugu aalajangersakkat malillugit sulieminik ingerlatsinera pillugu nalunaaruteqartissinnaavaa.

Imm. 4. Kommune inissiatiminik nammineq aqutsisoq inissianik aqutsinerup inatsisartut peqqussutaat manna peqqussullu naapertorlugu aalajangersakkat malillugit ingerlatsineq pillugu nammineq kukkunersiuisuni nalunaaruteqartissinnaavaa.

Imm. 5. Inissiaatilik tunngavissaqanngitsumik kinguarsaanani imm. 1, 3 imaluunniit 4-mi nalunaarummik taaneqartumik ukiut tamaasa Naalackersuisunut nassiussisassaaq.'

Imm. 6. Namminersornerullutik Oqartussat kommunillu inissiaataannik attartortittakkanik najugaqatigiiffinnillu, taakkununga ilanngullugit inissiaatillip aqutsisulluunniit aningaasaliissutinik ingerlatsineranik, missingersuusiorneranik, naatsorsuusiorneranik kukkuneruineranillu nakkutilliinermut Naalackersuisut malittarisassiorsinnaapput."

12. § 61, imm. 3-mi "imm. 4" "imm. 2"-nngortinneqassaaq.

13. § 62, imm. 1-imi "§§ 57-60" "§§ 57, 58 aamma 60, imm. 1 aamma 2"-nngortinneqassaaq.

§ 2.

Peqqussut 1. juni 2003-mi ullormit tassannga atuutilersumik atuutilerpoq.

Namminersornerullutik Oqartussat, ulloq uu. qqqq 2003.

Hans Enoksen

/

Mikael Petersen